



Inatsisartuni ilaasortaq Hans Enoksen, Siumut
/Maani

Avataani kilisallutik qaleralinniartut qalerallit mikivallaartut tunisassiarissallugit pisisartagaat pillugit § 37 naapertorlugu apeqqummut nr. 2013-224-mut akissut.

26. november 2013
Suliap normua 2013-092323
Dok. Nr. 1393862

Apeqquut 1

"Avataani kilisallutik qaleralinniartut qalerallit mikivallaartut tunisassiarissallugit pisisartagaat qanoq pineqartarpat? Iginneqartarpat imaluunniit tamarmik tunisassiarineqartarpat?"

Postboks 269
3900 Nuuk
Oqarasuaat (+299) 34 50 00
Allak (+299) 34 63 55
E-mail: apnn@nanoq.gl
www.nanoq.gl

Apeqquut 1-imut akissut

Ilisimatitsissutigisinnaavara qalerallit mikivallaartut pisineqartillugit qanoq iliornissaq pillugu malittarisassat Aalisarnermi saniatigut pisat pillugit Namminersorlutik Oqartussat nalunaarutaanni nr. 14, 6. december 2011-imeersumiimmata.

Aallarniutigalugu ilisimatitsissutigineqassaaq qalerallit pisineqarsinnaasut minnerpaaffissarimmassuk 42 cm. Tamanna nalunaarummi taaneqartumi § 2-mi allassimavoq.

"§ 2. Saniatigut pisat tassaapput imaani uumassusilinnik pisat tamarmik, tamakku tassaappata:

- 1) angallatip aalisarnissamut akuersissutaanut ilaanngitsut, (licens),
- 2) ilanngussami 1-imi minnerpaaffissatut uuttuutinik naamassinnissimangitsut."

Aalajangersakkami aamma allassimavoq pisat mikivallaartut saniatigut pisatut isigineqartariaqartut. Tamanna nalunaarummi § 6-imi malittarisassaqartinneqarpoq:

"§ 6. Bundgarniunngitsunik aamma saattuanut pullataangitsunik atortoqarluni aalisarnermi aalisarneq unitsinneqassaaq aalisarfillu qimanneqassalluni ataasiarluni amuarnermi saniatigut pisat kalinnermi tamakkerlugit pisat oqimaassusiisa 10 %-ii sinnerpagit. Stk. 2. Aalisarneq aallarteqqinneqassanngilaq umiarsuup allattaaviini allassimasutut kalinnerup aallartiffianiit kalikkunnaarfiullu akornanni titarnermiit 5 sømilinit qaninnerusumi, umiarsuup allattaaviiniit allassimasutut kalikkunnaarnermiit minnerpaamik nal. ak. 60-it qaangiutsinnagit."

Pisat tamarmiusut 10 %-ii sinnerlugit mikivallaanik pisaqaraanni aalajangersakkami imm. 2 malinneqassaaq.

Aammattaq nalunaarummi § 5, imm. 2-mi allassimavoq pisat suulluunniit, taakkununga ilanngullugit qalerallit mikivallaartut (42 cm-it inorlugit angissusillit) angallammi unngatinneqassasut nunamullu tulaanneqassallutik.

Taamaattumik pisat mikivallaartut tamarmik tunisassiarineqassapput tulaanneqarlutillu.

Naggasiutigalugu ilisimatitsissutigisinnaavara inuussutissarsiummik ingerlataqartunit paasissutissiissutigineqartut naapertorlugit qaleraleeqqat nunani tamalaani niuerfinni piumaneqaleralluttuinnarmata. Piumaneqarnerat ima annertutigaaq tunisassiaq taanna qalerallinnit nalinginnaasumik angissusilinnit akisunerusinnaalluni.

Inussiarnersumik inuulluaqqusillunga

Karl Lyberth